

netia per li rectori de Cypro; et che dimandò bombardate, che era contra la fede nostra, fo mandati via, ma fo ben visti *etc.* La seconda audientia publica me feze le medesime oposition, con dolersi di le cose de l' isola, che se dava aqua e biscoti a' corsari; che si soleva tenir galie sotil per varda di diti, et che nulla si fazeva. Poi volse farne lezer nuove deposition, che havea fato deponer quello inimicissimo de Tagavardin. Io, sempre constantissimo, in la prima audientia, chè nula sapea, anzi che molti magrabini, agamini, che me havea rechiesto lettere di recomandation, che mai ad alguno avea voluto farle, perchè el nostro paese era aperto a tuti; in la segunda, mi volse far lezer deposition. Io, che sapea che quel Nicolò Soror, et suo compagno, era stato menato in castelo per meterlo a l' incontro, dissi, che non accadeva deposition, dove era, chi havea deposto, presente, che li fesse venir; et el soldan li feze chiamar.

120* Alhora io li dimandai, si lhoro me havea visto parlar, o dar lettere, o cognoscer alguni del Sophi; disse de no, che non sapea de questo niente. Alhora con voce alta dissi, di lo turchesco, forte al signor soldan, et cussi feze alhora, alzai le parole et talmente me strinsi, che 'l soldan, che voleva, presenti tanti armiragij, desonestarmi, rimase confuso, e da stiza me feze meter in cadene, con tanto despiazer de tutti li circostanti, che non è possibile piu. E tutti, per la Dio gratia, cognoscete che io non havea colpa alcuna, et ebe a piazer che io parlasse liberamente, senza alcun segno de timidità, come per ogni canto è pervenuto a le orecchie nostre. Lasso de dirvi la risposta che fizi a le cose de l' isola, che dava aqua et biscoto, et di quelle galie sotil; chè li respusi benissimo a proposito, et con honor de la Signoria nostra. Chiamò poi el consolo d' Alexandria, e li disse: Tu che me dizi, che sapevi esser quelli stati a Venetia, perchè non me lo far avisà? E intrò sopra le galie, che se dovea tenir in Cypro, et in quella colora, che non havea in quella audientia parturito el suo desiderio davanti tanti armiragij, li feze meter tutti li merchadanti alexandrini in catene, et feza questa ultima conclusion: Andate tutti insieme; contentate el mio cuor, altramente vi cazarò del paese, chè o altri che me dà el partito. Et cussi se ne andassemo a casa del Nadracas, dove li, lui vene el Matasebo, e ne disse: Vuj avete inteso, fate bon el cor al soldan. Li dicessemo, che nui non sapevamo quel fosse la volontà del soldan, et li fu parole zeneral. Disse: Pensè questa notte. L' altro zorno, che vene, li rechiedesemo una audientia secreta, la qual ne fo data a di 3 marzo. Come li fossemo presenti,

disse: Vuj non date più utile al mio paese; sollevate mandar in Alexandria galie 7, a Damasco 5, charge de roba, e li magazeni se impiva; al presente nulla portate. Sollevate tenir in Cypro galie, nulla fate; date aqua e biscoti. Ve ho mandato uno ambasador, me ne avete promesso un altro a mi, et altre cose; non li avete fate, et altre zanze, che mi riporto a le lettere publice. Vuj non fate per el mio paese; o chi me dà partito; ve ho mantenuto li capitoli, vuj me haveti roto li mei e le usanze vecchie; se voreti far el mio cuor bon, ve tenirò volentiera, farò tutti quelli comandamenti vuj volete; et si risolse. Io li rispusi, che, se le facende se fazeva poche, non causava da nui, ma che le specie non era, et che a Damasco se soleva trazer colli 6 in 7 milia; che al presente se trazeva colli 1200, li quali veniva levati da nui, et 121 che, partite le galie, non restava onza, come sapea Mobedin, che era li presente; et che se più roba venisse, più galie veneria, et che questo non manchava da nui; et ben me fondai qui, perchè havea respeto a la cosa de le 9 per 100. Alora me disse: Si in el mio paese non vien robe, perchè ste' vu? et si comenzava acender. Parendoli, che questa risposta l' avesse morso, e tutti li barsarini me disse, che respondesse humanamente, li dissi, che diceva la verità; quanto a Tagavardi, ladro, che li havea dito che la Signoria li havia promesso ambasador et altre cosse, li dissi, che io non sapeva che li fosse stà promesso cossa alcuna, ma che ben sapea che la nostra Signoria non vien a mancho de quanto prometo; et a tutte le altre parte li fu, ben a proposito, risposto, chome intendereti ne le lettere publice. Da poi, per tuti li balsarini, e per Mobedin, fu laudato la risposta di le spezie, e disse, che 'l soldan la sentì asai, e fo necessaria. Questo ve dico, perchè è qualche opinion de' nostri, che li par che li parla tropo liberamente, et crede, con submission for del dever, per el parlar mio, far meglio, et io tengo l' oposito. Nè voglio tazervi, perchè parlo con el mio cuor, parlando con vuj, che, hessendo in deliberation de porzer una suplication per saper quel è sto voler e cuor del soldan, alguni voleya che se dizesse, che se haveano fato pechato alguno, se li dimandava perdonanza; jo per niente, perchè non cognosceva eror alguno in nui. Pur la brigata voleva questo, perchè el soldan, se dize, esser de questa natura, et che tutti, *juste vel injuste*, fa questo, el che fo deliberato che se dovesse far ben riservatamente. Io non vulssi, non hessendo de quella opinion, che la suplication fosse in el mio nome. Or l' andò. El soldan repose in scrittura, e quella risposta man-